

摘藻堂四庫全書薈要

史部

欽定四庫全書薈要卷七千八百十

史部

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四十

蠲賑三

康熙四十年辛巳二月癸酉

上諭直隸巡撫李光地曰朕歷年省耕畿甸諮訪民隱屢
行蠲賑加惠黎元近見霸州大城文安地居窪下被水
最甚雖遇豐年民猶艱食其三州縣累年積逋及本年

應徵地丁正項察明豁免務使窮民咸沾實惠如有勢豪土棍包攬侵冒不肖有司聽胥吏作弊指富作貧假捏災傷以致澤不下究據實題叅期於民困獲蘇以副朕愛養軫恤之意

十月己未

上諭戶部朕孜孜圖治宵旰靡寧於民生疾苦時切軫念甘肅等處地方切近邊陲土瘠田薄今年雨澤愆期田禾多有未獲閭閻饑困朕心深用憫惻已特飭該督撫

等官將被災之處親行蠲賑令其得所更念來歲青黃不接西土小民輸納維艱著將甘肅巡撫所屬州縣衛所康熙四十一年分地丁錢糧通行豁免地方有司務期切實奉行毋令官吏借端侵漁俾小民得均沾實惠以副朕軫恤災黎至意

癸亥

上諭戶部朕惟帝王致治裕民爲先免賦蠲租實爲要務矧江蘇等處地方尤爲財賦重地朕比年巡幸東南目

擊民艱多方軫恤令其安乂猶恐有司奉行不力德澤未盡下究民生罕遂康阜莫登茲將江蘇巡撫所屬州縣等處除漕項外康熙四十一年地丁錢糧盡行蠲免地方有司務期實意奉行使閭閻窮黎均沾實惠庶幾民生樂利豐裕可期倘不肖官吏陽奉陰違私立名色借端科派恣行侵剋負朕愛養生民至意事發定行正法決不姑貸

康熙四十一年壬午十一月乙卯

上諭大學士等曰蠲賦爲愛民要務徵取錢糧原爲國用不足國用若足多取奚爲比年以來附近省分俱屢行寬免惟雲南貴州四川廣西等處未得常邀蠲恤今戶部庫帑有四百萬兩每年竝無糜費國帑大有贏餘朕欲將此四省四十年錢糧悉行蠲免倘更寬裕并及廣東省亦令蠲免其蠲免四省諭旨明春即行曉示庶經費易爲措置也

丙辰

上諭戶部今歲山東河南地方俱報豐稔惟被災州縣民

多匱乏頃朕巡幸至德州見有一二災民流移載塗者
詢問疾苦深爲軫念雖據山東巡撫稱被災州縣已令
地方官發粟散賑但自冬徂夏青黃不接之際頒賑不
繼無以資生應行山東河南兩省巡撫凡被災地方令
有司加意賑濟至明歲麥收時方止其災傷田糧雖已
照分數蠲免猶恐被災之後民力艱難宜更沛特恩用
加休養山東萊蕪新泰東平沂州蒙陰沂水河南永城
虞城夏邑被災州縣康熙四十二年地丁錢糧除漕項

外著察明通行蠲免該地方官務悉心奉行俾閭巷窮黎均沾實惠以無負朕宵旰勤民殷殷軫恤至意又

諭曰從來致治之道裕民爲先故必蠲免田租時加膏澤而後閭閻充足永享樂利之休朕臨御以來咨求民瘼蠲賑頻施誠恐小民疾苦未蘇生業未遂用是宵旰靡寧江北田土瘠薄生計尤艱朕心彌切軫念著將安徽巡撫所屬府州縣衛等處康熙四十二年地丁錢糧除漕項外通行蠲免地方有司務切實奉行俾小民得沾

實惠以副朕愛養黎元至意倘不肖官吏陽奉陰違或
借端苛取澤不下究事發定從重治罪不宥

諭曰朕撫御寰區四十餘年無一刻不以民生爲念天下
至大兆民至衆惟恐窮鄉僻壤百姓疾苦不能上達所
以孜孜勤求未嘗少懈天時水旱自古有之備荒之法
全賴督撫得人倘平日虧空一遇歉薄莫知所措遂諱
災不報視民命如草芥何以爲民父母况秦省不通水
運若不謹於蓋藏儉歲難於賑恤河西一帶地方素稱

貧瘠雖免康熙四十一年錢糧民生未裕再將康熙四十二年地丁錢糧通行蠲免該督撫遍示所屬地方務使閭閻均沾實惠以副朕愛養元元至意如有不肖有司違旨私徵希圖侵蝕者督撫察叅從重治罪或被傍人告發或被科道糾劾該督撫一并嚴議

康熙四十二年癸未正月壬申

上諭戶部朕甲子己巳兩次南巡路經東省見民生豐裕士庶樂利近來淮黃告成朕不辭遠涉減從輕裝待旦

而興夜分乃寐再經齊魯存問民生休戚似不及甲子
己巳朕深憫恤如痼瘕之在抱也若閭閻蓄積有餘卽
遇有水旱亦不致困苦今特加恩蠲恤用宏愛養朕所
經過地方德州平原禹城齊河歷城長清恩縣夏津武
城館陶臨清清平博平堂邑聊城東阿陽穀壽張滕縣
嶧縣二十州縣康熙四十一年未完地丁錢糧著通行
蠲免濟南府屬之海豐利津霑化兗州府屬之寧陽滋
陽泗水金鄉單縣曹縣鄆城曲阜費縣十二縣去歲農

收歉薄康熙四十一年未完錢糧亦行免徵其去歲曾被水災之東平新泰蒙陰沂州沂水萊蕪六州縣康熙四十一年未完錢糧亦著全免其泰安郛城魚臺汶上嘉祥鉅野濟寧七州縣雖未成災康熙四十一年未完錢糧俱著蠲免康熙四十二年地丁錢糧著分三年帶徵爾部卽移文該撫率各州縣有司詳慎奉行務令人沾實惠戶有餘藏以稱朕重期黎元殷阜之至意

二月丁丑

上諭河道總督張鵬翮曰朕經過泰安新泰蒙陰沂州郯城等州縣見民有饑色應卽行賑救經過地方雖經賑濟蠲免錢糧但州縣倉穀年久朽爛無裨於散賑今著漕運總督桑額以漕米二萬石付爾揀選賢能官員運至濟寧州兗州府等處卽行賑濟桑額亦將米二萬石於泰安州一路散給又將收稅有力之官七員竝發在京旗民犯罪降級贖罪人一百名伊等俱照養蒙古例以所用之多寡分別議敘

壬午

上南巡舟過邵伯更樓

諭河道總督張鵬翮曰此地舊日被災情狀與今山東饑民無異豈朕今日覩此地安居景象而忘山東之饑民乎朕念運糧賑濟事不可緩乘今日順風爾作速回清江料理轉運截畱漕糧差官前往山東散賑

七月戊申

上諭大學士等曰今歲山東雨水連綿黎民被災若不豫

爲賑濟一經逃散難復安集今當照前養山東饑民例
多遣人員令其撫養爾等可會同九卿議奏

已已

上諭大學士九卿詹事掌印不掌印科道等曰今六月內
因有二王之事朕心不勝悲慟至今猶未釋然至饑民
救養之計未嘗時刻不厯於懷近有蘇州織造李煦人
來詢知郟城至泰安田穀稍有可望由泰安至德州被
災甚重今歲口外田穀大收口內各處田禾俱屬平常

合共計算所糶之穀必不能多今應將漕糧多行截留
與山東沿河州縣村鎮俱各存貯以備賑濟平糶之用
朕意八旗滿洲蒙古漢軍佐領一千有餘每三佐領下
共出一人可得三百人每三佐領借與銀三千兩分派
各州縣仍照前去人員贍養饑民至來年七月爲期及
今八月內可卽到彼爾等確議具奏至東省今歲錢糧
漕米俱應速行停徵爲此手書特諭

癸酉

上諭大學士等曰賑濟山東饑民事關緊要應差大臣分爲三路每路差大臣一員將先派去人員一并往返巡察於事有益自泰安至郟城爲中路著穆和倫去自濟南至登州爲東路著辛保去自德州至濟寧爲西路著卞永譽去截留漕糧亦屬緊要總漕桑額現今無事著作速前來親看截畱其賑濟饑民人員所領雖係公物而勉力自効有濟於民事竣回時一并議叙

八月丙子

上諭戶部邳州等處地方屢被災傷不減於東省但尚有水路可通著該督撫親往察閱應作何速行拯濟一面頒賑一面奏聞俟具題到日將應蠲豁錢糧另議具奏

十月壬午

上諭戶部山東省去歲收成各州縣豐歉不一今春朕南巡過山東時已分別被災輕重蠲免錢糧竝遣効力人員星馳賑濟比及回鑾東省又告潦災朕宵旰軫懷悉心籌畫截畱漕糧平價發糶兼出帑金遣八旗人員分

道散賑仍於三路各遣大臣經理所在饑民庶得資以全活不致仳離失所猶念被災之後民力未紓宜更加德澤以宏休養康熙四十三年地丁銀米著通行蠲免有積年錢糧拖欠在民者亦著察明免徵行文該撫率所屬有司詳慎奉行務令人沾實惠有違旨私徵者察出定行從重治罪仍令各州縣遍示曉諭俾窮鄉僻壤咸悉朕惓惓惠愛災黎至意又朕南巡回時原擬蠲浙省明歲錢糧茲因東省災傷先行蠲免其浙省錢糧俟

至明歲另頒諭旨

甲午

上諭大學士等曰朕聞山東巡撫布政使將賑濟饑民人員齎去銀兩俱收布政司庫內迄今尚未賑濟如此則賑濟之事不致遲誤乎此項銀兩俱自京師發往竝非伊等庫內之銀且前往賑濟人員係三佐領合同薦舉殷實才能之人王國昌等但可查其養饑民之優劣其錢糧浪費與否乃賑濟官員干係與伊等何涉而爲收

貯乎是何意見朕所不解此又劉暄之詭計也况派去三百餘員不作速分派地方俱令久畱濟南必致米價騰貴人皆受困可將朕旨速交該部移問王國昌等

十一月戊午

上諭四川陝西總督覺羅華顯陝西巡撫鄂海甘肅巡撫齊世武等曰朕撫有區夏思臻上理期於舉世乂安宵旰勤勞未嘗少釋而秦省爲天下要地時厯朕懷曩者連歲荒旱所司未經奏報朕訪聞得實卽多方籌畫運

米賑救一由襄陽運至商州一命河臣由黃河運至潼
關一由湖灘河朔運至渭河一由甘肅運至西安分行
賑濟蠲正賦免宿逋安集流離秦民始得少蘇自康熙
三十二年遣皇長子允禔致祭華山以來雨暘時若年
穀豐登閭閻稍有起色但秦省關係最重且不通水運
撫綏尤宜加意故不憚隆冬跋履風霜遠臨茲土見百
姓歡迎載道且知今歲有秋地方文武官吏更能恪勤
奉職滿漢軍士亦皆訓練有方朕心甚悅凡巡幸所至

必大沛恩膏今將陝西巡撫及甘肅巡撫所屬地方康熙四十二年以前各項積欠銀米草豆錢糧盡行蠲免俟四十三年直隸各省咸獲豐稔當將秦省四十四年正供亦行免徵該督撫通行曉諭俾窮鄉僻壤小民均沾實惠倘有不肖有司希圖侵蝕以致澤不下究該督撫嚴加訪察據實指叅以副朕愛養黎元之至意

康熙四十三年甲申三月庚戌

上諭八旗都統等曰聞京城附近有山東之民河間之民

行乞頗衆已於五城給食而施與未均或不徧及著八旗各於本旗城外分三處煮粥飼之八旗諸王亦於八門之外施粥大爲利濟今已派出諸人赴山東養民但此輩俱集京師求乞若不如如此設法賑濟則皆立斃矣茲派出鑲黃旗國舅佟國維正黃旗內大臣明珠正白旗內大臣阿密達尚書馬爾漢伊家人衆監散爲易其他五旗著派大臣家計殷實者監賑凡粥廠所飼之民病則醫治歿則棺殮至給粥時詳加識認恐此處既食

又顧之他務使清楚周徧爲善如或怠玩施不周徧察出竝罪都統副都統斷不輕恕至漢大臣有仰副朕旨施賑者亦分爲三處內務府大臣亦將內務府人分爲三處俱令殷實可託之人監賑

六月戊子

上諭大學士等曰觀山東巡撫所奏今歲春麥大獲又問自山東省來人咸云民生大有起色不似從前被災景象此甚非易致也山東百姓今始獲甦明歲錢糧不可

急徵若秋田有收再當商酌爾等識之俟十月十一月間啟奏

十月甲戌

上諭戶部今歲直隸地方雨暘應候禾稼有秋各郡民生皆獲安恒業惟是去歲山東被災之民自冬月以迄春夏流離轉徙入順天河間境內者甚多於時設廠煮糜所在賑救而米價至今未減誠恐近畿一路間井小民拙於生計是宜加恩寬恤用宏休養順天河間二府屬

康熙四十四年應徵地丁銀米著俱蠲免該巡撫卽飭
府州縣官徧諭窮鄉僻壤以副朝廷優軫畿輔黎氓至
意又

諭曰山東比年歉收民生艱窘朕焦勞宵旰未嘗晷刻稍
釋於懷康熙四十一年錢糧既分別減免帶徵又停四
十二年徵收蠲四十三年額賦截漕平糶發帑賑施遣
用多員分道贍養有就食京城者復設廠煮糜命滿漢
官員資送回籍給以籽粒之需然後民間漸有起色今

歲幸風雨和調二麥畢登秋禾稔獲流移悉返里閭復業者咸安耕鑿朕於往來山東人員備加詢問深用心慰但念被災之餘甫離重困若非大敷恩澤終不能遽底盈寧將康熙四十四年山東省應徵地丁銀米等項除漕糧外悉行蠲免從來水旱靡常撫綏百姓之道全視大小官吏實心講求庶幾民有攸濟諭旨到日該巡撫卽飭有司張示曉諭務俾通省均沾實惠仍牘導小民撙節益藏期於比戶皆有餘蓄則於朕惓惓爲民經

畫之意可以無負矣又

諭曰朕昨歲南巡至浙江見其農桑徧野戶口蕃殖閭閻
氣象較勝於康熙三十八年巡幸之時甚爲心慰浙省
錢糧雖前此屢經蠲貸而朕車駕親臨應更敷恩寬恤
俾民生益加充裕當回鑾以後即擬免康熙四十三年
額賦因山東急賑災荒遂爾少緩茲直隸各省皆獲有
秋特申前命康熙四十四年浙江通省應徵地丁銀米
等項除漕糧外著俱蠲免諭旨到日該督撫即嚴飭有

司張示徧諭務使窮簷蔀屋均沾實惠地方大小官吏
仍不時訓誡小民令各守分節用不論年歲豐歉咸有
蓋藏庶無負朝廷殷殷愛養賜租給復之至意

辛巳

上諭戶部朕宵旰孳孳惟以康濟生民爲念每歲四方水
旱皆諭令各督撫不時奏聞仍間遣人員馳往各路諮
詢農事有自外省來者必詳問所過地方雨暘耕作之
狀凡以民生所重無如粒食不得不預爲經畫也康熙

四十一年冬朕巡幸至山東德州聞知萊蕪等六州縣民被災傷卽將四十二年錢糧悉予豁免及四十二年春南巡視河經行泰安一路見其閭閻生聚遠不逮於從前隨下諭詳察被災州縣蠲除額賦竝動倉穀賑濟但蠲賑雖行而人民甚屬窘迫非以贍養蒙古之法行之不能立遂生計再三籌策乃命官民願効力者百餘人星速前赴山東計口授糧給衣濟用兼量助牛種等物貧窶之民皆賴以全活比朕避暑口外覺夏月雨水

頗多即命行文移問山東等省而東省果告潦災秋禾
失收民滋困苦但地方人情猶帖然安堵此即遣官養
民之實效也因又下諭增益多員分往被水失收處再
加賑濟顧各州縣地廣人衆需費浩繁猶必大張賑施
方能徧及特命漕臣親赴東省截畱漕糧五十萬石分
貯沿河鎮市衝要之地散賑而外即平價發糶又諭八
旗滿洲蒙古漢軍每三佐領各派一人計得三百餘人
此所派人員每佐領領帑金一千兩給之並備車輛駝

馬等物令分往山東各州縣照前遣人員贍養以至來
年七月爲期其登青菜三府則截留漕米由天津海道
運至其地每府各三萬石又遣大臣三員分三路往來
巡視稽覈散賑事宜酌定平糶價值而民間始盡沾實
惠至於未經散賑之際饑民有流入京城者老幼仳離
急於得食爰於今歲正月命八旗王貝勒大臣內務府
官員竝漢大臣官員設廠數十處煮賑一月有餘復念
饑民拋棄鄉土久住京師究非長策於是遣官催募船

隻悉送還籍仍給以銀兩爲日用籽粒之資而流移之人遂得復安本業入夏以來風雨調和二麥稔登秋田多稼該省呈進穀穗合之往來人等奏對之語朕心始爲大慰夫水旱災傷事所時有非恃廟堂之上多方賑救則民將何依朕爲山左勞心籌畫者兩載於茲迺幸奏有成效今三路大臣及該撫俱奏年穀順成民生得所賑事告竣前後効力諸臣宜加獎勸去歲春秋二次遣往養民各員著察明議敘內有自出已力贍養饑民

者從優議奏其在京捐銀及資送回籍人員亦著一併議敘東省停止陞轉官員俱令照常陞轉

十一月戊戌

上諭大學士等曰明歲春間正青黃不接之時當自正月爲始於京師及通州地方發倉米照今年例平糶爾等會同戶部議奏

康熙四十五年丙戌五月丙寅

上諭大學士等曰前日直隸巡撫趙宏燮摺奏河間數州

縣歷年拖欠錢糧請分年帶徵朕已批發令其具題至直隸各省歷年拖欠錢糧總數著交戶部查明速奏內有民困無徵者酌量豁免

甲戌

上諭戶部朕宵旰圖維勤求民隱每欲敷蠲貸之恩以爲閭閻畱有餘之力直隸山東地方康熙四十二年偶遇災荒因特免山東康熙四十三年四十四年額賦竝康熙四十一年以前積欠錢糧直隸則順天河間兩府康

熙四十四年額賦亦俱行豁免今雖屢年收穫民氣漸舒而所有宿逋尚應輸納朕念黎元方有起色辦賦猶艱若一時新舊竝徵勢難兼應宜更寬恤以宏休養直隸自康熙四十一年至四十三年各府屬未完民欠銀八萬二千七百兩有奇糧五千九百石有奇山東省康熙四十二年各府屬未完民欠銀一百六十九萬一千七百兩有奇糧五千九百石有奇或現在徵取或分年帶徵俱著蠲免俾小民悉除逋負之累倘應徵舊欠有

現完納在官者即准抵本年正賦諭旨到日各該撫速
行所屬有司徧示曉諭倘有不肖官吏朦混徵收不與
開除明白者該撫即時叅劾嚴加治罪

十月己酉

上諭戶部朕子育黎元日求所以休養利濟之道念惟賜
租減賦實有裨益於民生直隸各省錢糧次第全蠲一
年者業經數舉獨是歷歲逋負積累加增舊稅新徵勢
難兼辦縱使稍寬民力分年帶輸而督令續完仍多拮

据朕睠懷及此深切軫恤用是大沛恩膏俾閭閻獲免
追呼官吏亦不罹叅罰直隸山東積欠錢糧今年俱已
蠲免其山西陝西甘肅江蘇安徽浙江江西湖北湖南
福建廣東各省自康熙四十三年以前未完地丁銀二
百一十二萬二千七百兩有奇糧十萬五千七百石有
奇著按數通行豁免或舊欠已完在官而現年錢糧未
完足者亦准扣抵

十一月甲戌

上諭戶部今歲漢江水大南鄭等縣城垣田舍被水衝沒
且米價騰貴小民艱食所有本年應徵錢糧著豁免明
年以後地丁錢糧亦暫行停徵俟應徵收之年該督撫
察明具奏起科現在被災人民著督撫速行賑濟

康熙四十六年丁亥十月乙酉

上諭戶部江南地方頻年雨暘時若百穀阜成閭井黎氓
咸得遂生樂業但民間宿鮮蓋藏禦荒無術一遇歲歉
即有匱乏之憂朕屢次南巡素所洞悉今年自夏入秋

雨澤愆期該督撫先後奏至朕念小民久未被災驟罹
荒旱所關甚鉅業今敕令停徵竝發倉穀賑濟顧倉儲
數少未足徧給惟各州縣截畱漕米可以實惠及民目
下時已屆冬著總漕桑額會同總督邵穆布巡撫于準
親歷各州縣被災地方備加察勘將今年所徵漕糧每
州縣或畱八九萬石或畱十萬石酌量足支給賑濟之
數分別多寡存畱支散及今漕米尚未開兌截現收之
糧以濟待哺之衆實於民生大有裨益此朕殷殷懷保

赤子軫念如傷之至意爾部卽移文該督等實心奉行
仍開具賑濟實數奏聞又

諭曰從來漕糧關係倉儲最爲重要每歲刻期輸輓概不
停徵卽蠲除節年額賦亦不及漕項朕前以國家經費
尚充曾有酌免漕糧之事係出特恩去年頒發諭旨已
將江南省民欠地丁銀米自康熙四十三年以前通行
豁免而漕項所欠尚在徵收今念江南地方現被旱災
除新徵糧米另有諭旨酌量截畱散賑外其康熙四十

三年以前江蘇巡撫所屬各府州縣未完民欠漕項銀六十八萬七千兩有奇米麥三十一萬一千八百石有奇著該撫一一察明悉與豁免用舒閭閻之餘力俾辦額運之正供事切利民蠲逾常格爾部行文該撫令張示遍諭務使均沾實惠以稱朕深軫民依之意

十一月己酉朔

上諭戶部江南浙江地方賦役殷繁倍於他省朕屢經巡歷時切朕懷比年以來業已節次敷恩頻行蠲貸頃因

兩省偶被旱災隨命按數減徵豁免漕欠竝分截本年
漕糧令該督撫親往散賑猶念民間素鮮積儲生計不
充非更加格外滋培則荒歉之餘未能驟臻康阜茲特
再施恩澤用宏休養康熙四十七年江南浙江通省人
丁共額徵銀六十九萬七千七百餘兩著悉予蠲免其
今年被災安徽所屬七州縣三衛江蘇所屬二十五州
縣三衛應徵康熙四十七年田畝銀共二百九十七萬
五千二百餘兩糧三十九萬二千餘石浙江二十州縣

一所應徵康熙四十七年田畝銀九十六萬一千五百
餘兩糧九萬六千餘石俱著免徵所有舊欠帶徵銀米
竝暫停追取俟開徵時一併輸納務使小民一歲之內
絕跡公庭安處隴畝俾得優游作息經理農桑庶幾閭
里氣象可以日加豐豫諭旨到日該督撫體朕惠愛黎
元至意各飭有司實心奉行仍張示通令知悉倘蠲除
不實致有侵冒察出從重治罪

康熙四十七年戊子十月戊午

上諭戶部朕屢次南巡見閭里殷阜之象遠不逮於舊時

雖不時蠲免額賦停徵積逋僅可支吾卒歲絕無餘積
朕每念及此未嘗不爲之惻然去年江南浙江兩省俱
被旱荒多方軫恤民力稍蘇迄今歲復報潦災旋經照
例蠲賑竝畱漕資濟但歲再不登生計益匱欲令辦賦
力必難供康熙四十八年除漕米外江南通省地丁銀
四百七十五萬四百兩有奇浙江通省地丁銀二百五
十七萬七千兩有奇著全行蠲免所有舊欠帶徵銀米

仍暫行停止此朕因江浙二省爲東南重地特於格外
施仁用宏休養之至意該督撫各飭有司張示徧諭務
令窮鄉鄙屋咸共知悉倘或別借事端侵冒徵派事發
重治罪



大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四十



總校官庶吉士臣張能照

校對官修撰臣吳錫齡

校對官檢討臣李學錦

謄錄監生臣蔣維暨

謄錄監生臣王詢

欽定四庫全書會要

史部

聖祖仁皇帝聖訓卷四十一

詳校官編修臣繆晉

欽定四庫全書薈要卷七千八百十一

史部

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四十一

蠲賑四

康熙四十八年己丑十月壬戌

上諭戶部今歲入夏以來朕因南方二麥不登北地微潦
宵旰軫念甚切焦勞繼而畿輔稔收三吳秋熟兼以四
方奏報咸獲有年朕心始爲稍慰夫水旱災傷雖事所

時有而小民皆如赤子一以疾苦見告卽不忍忍置於懷今念江南淮安府揚州府徐州三屬地卑積水被災獨重秋禾未播種者甚多本年錢糧業經全免又遣官分賑而失業之民更宜加格外之恩以宏愛養康熙四十九年淮揚徐三屬之邳州等二十二州縣衛額徵地丁銀五十九萬三千八百兩有奇著悉與蠲免又河南省歸德府屬商邱等六縣山東省兗州府屬濟寧等四州縣或被夏災或被秋災雖已各依分數例免額賦竝

宜更施膏澤用厚民生康熙四十九年商邱等六縣應
徵地丁銀二十萬二千四百兩有奇濟寧等四州縣應
徵地丁銀十四萬六千六百兩有奇俱著蠲免州縣有
舊欠未完錢糧亦著停徵一年諭旨到日各該督撫務
嚴飭有司體朕殷殷恤災至意張示徧諭悉心奉行俾
窮鄉僻壤均沾實惠如有不肖官吏借端私徵者卽行
察叅

十一月庚辰

上諭大學士等曰本朝自統一區宇以來於今六十七八
年矣百姓俱享太平生育日以蕃庶戶口雖增而土田
竝無所增分一人之產供數家之用其謀生焉能給足
孟子曰無恒產者無恒心不可不爲籌之也朕意欲將
康熙四十九年應徵錢糧預配各省用度爲之抵算至
五十年將天下應徵錢糧一槩蠲免如近省有支用之
事則以戶部庫銀給發應用

康熙四十九年庚寅八月乙亥

上諭戶部福建將軍祖良璧奏稱福建泉州漳州等處被旱未收福建民多田少不可不急爲拯救雖總督梁鵬曾疏請借銀買米平價糶賣但所買米數不多且一時不能運至曩昔山東江南等處被災朕一聞知卽爲拯救天下人民皆朕赤子應卽遣部院大臣會同江浙督撫截留本年起運鎮江漕糧十萬石松江湖州漕糧各十萬石鎮江之米運至狼山松江湖州之米運至乍浦著福建督撫提鎮不拘一人率領福建戰船將運往狼

山乍浦三十萬漕米轉運至福建賑濟被災之民務期
均沾實惠雖此米不能速至而被災之民聞朕此旨卽
歡悅而定矣其泉州漳州今年未完錢糧亦著暫行停
徵

十月甲子

上諭戶部朕恭膺

天眷祇承

列祖鴻庥統御萬方子育兆庶廼懷至治宵旰靡寧幸際

海宇同風邊隅向化遐邇中外帖然衽席之安是皆仰荷

天地

祖宗福佑之所致也方朕八齡踐阼之初

太皇太后問朕何欲朕對臣無他欲惟願天下治安生民樂業共享太平之福而已迄今五十年矣惓惓此心未嘗一日稍釋每思民爲邦本勤恤爲先政在養民蠲租爲急數十年以來除水旱災傷例應豁免外其直隸各

省錢糧次第通蠲一年屢經舉行更有一年蠲及數省
一省連蠲數次者前後蠲除之數據戶部奏稱共計已
逾萬萬一無顧惜百姓足君孰與不足朝廷恩澤不施
及於百姓將安施乎朕每歲供御所需緊從儉約各項
奏銷浮冒亦漸次清釐外無師旅饗饋之煩內無工役
興作之費因以歷年節省之儲積爲頻歲渙解之恩膏
朕之蠲免屢行而無國計不足之慮亦恃此經畫之有
素也比來省方時邁經臨七省南北人民風俗及日用

生計靡不周知而民生所以未盡殷阜者良由承平既久戶口日蕃地不加增產不加益食用不給理有必然朕洞矚此隱時深軫念爰不靳敷仁用甦民力明年爲康熙五十年思再沛大恩以及吾民將天下錢糧一槩蠲免因衆大臣議奏恐各處需用兵餉撥解之際兵民驛遞益致煩苦朕因細加籌畫自明年始於三年以內通免一周俾遠近均沾德澤直隸奉天浙江福建廣東廣西四川雲南貴州所屬除漕項錢糧外康熙五十年

應徵地畝銀共七百二十二萬六千一百兩有奇應徵人丁銀共一百一十五萬一千兩有奇俱著察明全免竝歷年舊欠共一百一十八萬五千四百兩有奇亦俱著免徵其五十一年五十二年應蠲省分至期候旨行民間舊欠既經豁免嗣後每年額徵錢糧務如數全完倘完不及額或別有虧空託稱民欠則負國甚矣即責令督撫以下官員償補仍從重治罪夫地方大吏以及監司守令皆與吾民誼均休戚者也誠克體朕孳孳保

赤之懷實心愛養力杜侵漁朘削則閭閻咸得衣食滋殖無有失所而爲官吏者亦身名俱泰豈非昇平樂利之盛事歟爾部移文各督撫諭旨到日即刊刻頒布徧示窮簷咸令知悉

十一月辛卯朔兵科給事中高遐昌疏言凡遇蠲免錢糧之年請將佃戶田租亦酌量蠲免著爲例上諭大學士等曰蠲免錢糧但及業主而佃戶不得沾恩伊等田租亦應稍寬但山東江南田畝多令佃戶耕種

牛種皆出自業主若免租過多又虧業主必平均無偏
乃爲有益著交部議奏

康熙五十年辛卯十月戊午

上諭戶部朕誕膺大統撫育寰區夙夜孜孜不自暇逸凡
以爲民生勤圖利濟休養安全即無水旱之虞時布寬
仁之政蠲租除賦務使遐方率土無不均沾或值雨暘
偶愆出帑發粟多方賑恤其有益於吾民者靡弗備舉
而亟行之朕懇懃周詳之至意前康熙四十九年所頒

諭旨甚明原欲將五十年天下錢糧通行蠲免以諸臣
集議恐需用兵餉撥解之際兵民驛遞益致煩苦故自
五十年爲始三年之內全免一週除將直隸奉天等九
省康熙五十年地丁錢糧一槩蠲免及歷年舊欠錢糧
一并免徵外山西河南陝西甘肅湖北湖南各撫屬除
漕項外五十一年應徵地畝銀共八百四十萬四千兩
有奇人丁銀共一百二十萬八千一百兩有奇著察明
全免竝歷年舊欠共五十四萬一千三百兩有奇亦俱

著免徵其康熙五十二年應蠲省分至期候旨行民間
舊欠既經豁免嗣後每年額徵錢糧務如數全完倘完
不及額或有虧空託稱民欠即責令督撫以下官員償
補仍從重治罪該督撫須實心力行期副朕惓惓愛民
之意如有指稱事故侵欺科派事發之日必嚴行究治
諭旨到日徧示城郭鄉村深山窮谷咸使知悉

康熙五十一年壬辰十月癸丑

上諭戶部朕宵旰孜孜勤求民瘼永惟惠下實政無如除

賦蠲租除每歲直隸各省報聞偶有水旱災傷照輕重
分數豁免正供仍加賑恤外將天下地丁錢糧自康熙
五十年爲始三年之內全免一週使率土黎庶普被恩
膏除將直隸奉天浙江福建廣東廣西四川雲南貴州
及山西河南陝西甘肅湖北湖南康熙五十年五十一
年地丁錢糧一槩蠲免歷年舊欠錢糧一并免徵外所
有江蘇安徽山東江西四省除漕項外康熙五十二年
應徵地畝銀共八百八十二萬九千六百四十四兩有

奇人丁銀共一百三萬五千三百二十五兩有奇俱著
察明全免其歷年舊欠銀二百四十八萬三千八百二
十八兩有奇亦并著免徵計三年之內總免過天下地
畝人丁新徵舊欠共銀三千二百六萬四千六百九十
七兩有奇各該督撫務須實心奉行體朕軫念民生至
意如有侵欺隱匿使惠不及民借端科派者該督撫嚴
行察叅督撫失察事發之日亦嚴加究治

康熙五十二年癸巳三月庚子

上諭大學士九卿等曰朕聞廣東米價騰貴朕軫念天下

民生無間遠近雖邊徼之外視之猶輦轂之旁也粵地
素號產米之區今米價驟增小民必致艱食督撫係封
疆大吏凡有關地方事務隨所見聞應即據實陳奏朕
處深宮已周悉萬里之情形而伊等漫無奏報殊屬懈
忽前福建歲歉米貴朕令截留江浙漕米由海道轉運
賑濟諭旨方頒市價立平於地方大有裨益今廣東亦
宜照福建截留海運朕詳詢投誠海賊陳尙義等見今

截留江南漕糧由海運八九月可至福建自福建八九日可抵廣東值今風勢不順不可轉運必至八九月後北風漸利始可轉運朕意於八九月後將水師營戰船裝載米石運送易於到廣而兵丁亦可熟練水勢其天下地丁錢糧前已於三年之內全免一週今粵地米貴若將本年地丁錢糧仍行催徵則民力維艱不免輸將之苦應將本年地丁錢糧停其催徵遣趙申喬前往廣東會同督撫將朕軫念民生至意刊示宣布以慰輿情

恩詔內有賞賚綠旗兵丁一款即令趙申喬動支廣東庫帑親行核實按名賞給使各沾實惠又

諭曰國家幅員甚大水旱豐歉勢有不齊凡遇歉收之年督撫等但據實速報則或蠲賑或停徵先期酌行於百姓乃有裨益至所奏地方官員捐俸賑濟皆虛名而已何益之有

十月庚寅

上諭九卿等曰朕念福建廣東沿海州縣值此青黃不接

之時宜酌量蠲免張鵬翮奏曰頃蒙

皇上特加殊恩已令運米賑濟矣且連年蠲免甚多見今
動用至康熙四十九年錢糧矣

上曰即動用至五十年錢糧有何妨礙今米雖運去但足
餬口不能辦錢糧也朕心惟以百姓爲重蠲免之事不
可遲延

十一月庚戌

上諭戶部朕勤求民瘼無間遐邇雖在邊徼遠省偶有旱

勞災傷無不訪察情形殫思賑救今歲直隸各省地方俱獲收成惟廣東三水清遠高要高明四會五縣福建侯官縣福右衛二處甘肅靖遠衛環縣鎮原縣固原州固原衛平涼縣平涼衛崇信縣慶陽衛靈州所會寧縣寧夏中衛寧夏所古浪所一十四處今歲夏秋被災各督撫已經奏聞雖各省地丁錢糧新經全免然一方災歉悉厯朕心艱食之際重以追呼朕所不忍其明年應徵廣東省三水等五縣額銀七萬七千七百兩有奇米一萬七千六百石有奇福建省侯官縣等

二處額銀三萬六千六百兩有奇米六千四百石有奇甘肅靖遠衛等十四處額銀四萬七千七百兩有奇米八萬八千五百石有奇草八十四萬三百束有奇悉與豁免爾部即行文各督撫務須實力奉行徧爲曉諭俾民間無催徵之累肆力東作用稱朕撫恤災黎至意

康熙五十三年甲午十一月庚戌

上諭戶部朕撫御寰區勤求民瘼凡地方水旱災傷必詳加咨詢先事豫籌其有荒歉上聞蠲賑頻施務令得所

五十餘年來夙夜孜孜如一日也前因甘肅靖遠衛等處年歲不登民艱粒食已多方賑濟本年錢糧或蠲或停而山地磽瘠民鮮蓋藏若不大沛恩施目前已自艱難來歲更何倚恃此被災二十八州縣衛所康熙五十四年額徵銀九萬七千八百七十兩有奇糧二十三萬九千四十石有奇草二百五十三萬七千八十束有奇俱著通行蠲免行文甘肅巡撫實心奉行務使比屋均沾實惠用副朕撫恤災黎至意

康熙五十四年乙未三月己亥先是

上以蒙古地方大雪

命理藩院遣官閱勘牲畜倒斃缺食窮困人等至是回奏
上諭曰散賑之事勢難速達吳喇忒等旗居近黃河蒿齊
忒阿霸垓阿霸哈納蘇尼特等旗有達爾諾爾郭果蘇
泰察罕諾爾諸水可先教其捕魚爲食每處派新滿洲
二十人并造船人等遣理藩院司官帶網前去教導蒙
古人等其作何運給米糧及給與牲畜養贍之處著速

議具奏

庚申

上諭阿霸垓輔國公達爾漢德木楚克等曰從前四十九旗田禾不收以致大饑朕施恩給以米糧又賞牲畜嗣因大雪牲畜殆盡朕復施恩如前爾等三年內已漸致富又七旗喀爾喀爲噶爾丹所敗牲畜帳房全無單身來歸者朕賜米糧牲畜等物不令死傷一人拯濟以後富逾舊日今爾等十餘扎薩克蒙古縱多不過萬數令

爾等富足甚易但爾等目今窮困救濟宜速而運米勢
需時日故先教以捕魚資食以待米至給散至其後施
恩養贍處朕見在籌畫二三年內可使致富也爾等徧
諭衆蒙古知之

五月甲辰

上諭理藩院聞被雪各蒙古因朕贍濟竝未傷損一人朕
甚喜悅蒙古等已知捕魚可將漁船及網給與伊等令
其仍在澤旁捕魚而食將所給米糧節省留以度冬又

所給牲畜不久蕃息即可漸致富饒矣

是日

上諭議政大臣等曰哈密爲策妄阿喇布坦所侵恐不能生理著甘肅巡撫遣官運送米糧牛羊往賑

六月庚辰

上諭大學士等曰甘肅地方被災之民應作何賑濟著九卿詹事科道會同速議具奏賑濟饑民之事較之征勦策妄阿喇布坦爲更緊要爾等可速傳諭

十月壬辰

上諭戶部朕早夜孜孜軫懷民瘼四方水旱時勤咨詢惟恐閭閻之蓋藏未裕一遇歉歲收穫失望窮黎即無以資生也直隸順天保定河間永平宣化五府所屬地方今歲雨水過溢田畝被淹者甚多穀耗不登民艱粒食見今緩徵賑濟雖惠澤頻施而來春應徵錢糧若仍行徵收恐匱乏之民輸將難繼著將五府州縣康熙五十五年地丁銀八十五萬五千八百兩有奇糧米豆穀一

十一萬五千五百石有奇草九萬四千九百束有奇悉與蠲免爾部即將此旨行文該督令徧飭所屬州縣官員務須實心奉行俾窮鄉僻壤均沾朝廷德意倘有不肖官吏私徵侵蝕者察出從重治罪

十二月乙酉

上諭戶部朕統一寰宇宵旰孜孜惟以年穀順成民生康阜爲念故凡地方水旱情形必時加諮詢其有歲偶不登即詔所司即行蠲賑五十餘年來未嘗稍懈前因甘

肅靖遠衛等處年歲歉收既已多方籌畫蠲賑頻施復將甘肅被災二十八州縣衛所康熙五十四年額徵銀糧草束通行蠲免但被災之餘民鮮蓋藏若非再沛宏施恐來歲辦賦猶艱將寧州隴西渭源狄道臨洮五州縣衛康熙五十五年額徵銀糧草束悉行蠲免外其靖遠二十八州縣衛所康熙五十五年額徵銀九萬七千八百七十兩有奇糧二十三萬九千四十石有奇草二百五十三萬七千八十束有奇亦盡與蠲免諭旨到日

該督撫即通行曉諭俾遐陬僻壤莫不周知務期均沾
實惠以副朕軫恤邊民至意

康熙五十五年丙申十月癸巳

上諭戶部朕統一寰宇無分中外皆欲久安長治共樂昇
平宵旰孜孜五十餘年未嘗頃刻去懷也策妄阿喇布
坦前曾頻行請安遣使來往近忽狂悖侵擾哈密哈密
已經編置佐領即與內地無異若不遣發師旅置之不
問斷乎不可故特徵兵備邊一切飛芻輓粟悉支正項

毫無累及閭閻然而行軍置驛及諸凡輓運皆由邊境
今歲山陝二省雖年歲豐收喜登大有但邊民効力轉
輸在所宜恤茲特大沛恩膏將山西屬前衛右衛大固
懷仁馬邑朔州保德等州縣衛陝西屬府谷神木安塞
綏德米脂安定吳堡保安榆林保寧常樂雙山魚河歸
德嚮水波羅懷遠威武清平甘肅屬山丹高臺古浪莊
浪西寧肅鎮寧夏左屯中屯平羅中衛靈州寧州平涼
固原鎮戎西安慶陽阜城甜水河州蘭州洮州等四十

一州縣衛所堡康熙五十六年額徵銀六萬六千一百
兩有奇糧米豆穀三十一萬七千七百二十五石有奇
草一百七十六萬五千九百束有奇悉與蠲免并將從
前積年逋欠亦悉與蠲除諭旨到日該督撫即徧行張
示使遐陬僻壤莫不周知仍嚴飭所司實心奉行以副
朕加厚邊民至意其或陽奉陰違澤不下究該督撫題
叅從重治罪

十二月壬子

上諭戶部朕御極以來念切民生時勤宵旰凡巡歷所至必以編氓疾苦備悉詢問蓋欲比戶之蓋藏恒裕三時之水旱無虞斯民氣和樂聿成豐亨豫大之休也頃者朕巡幸口外經過三河等州縣暨永平府交界地方見今歲秋成豐稔米價稱平惟是去年雨水過溢田畝間被淹沒朕深加軫恤蠲賦平糶轉漕分賑貧民斯不失所今者雖復有秋然僅足支一歲之用恐來年之輸將尚多難繼是必再沛恩膏始可大培民力著將順天永

平兩府大興宛平通州三河密雲薊州遵化順義懷柔
昌平寶坻平谷豐潤玉田良鄉涿州武清永清香河霸
州大城文安固安東安房山保定延慶梁城盧龍遷安
樂亭灤州撫寧昌黎山海等州縣衛所康熙五十六年
地丁銀二十六萬四千三百三十六兩有奇米豆高粱
二萬一千六百四十六石有奇草九萬四千九百五十
束有奇俱通行蠲免所有歷年積欠銀九萬三百九十
六兩有奇米豆高粱一萬六千三百七十五石有奇草

八萬四千四百七十束有奇亦竝與豁除

康熙五十六年丁酉十一月丙子

上諭戶部朕撫馭寰宇五十餘年夜寐夙興爲小民勤求
生遂凡率土遠近皆期共享樂利聿成家給人足之休
未嘗一日去諸懷也數十年以來各省正賦屢經全免
歷年積欠亦已蠲徵偶有雨澤愆期或發倉廩散給或
截漕糧賑救不惜億萬金錢米穀頻沛恩施誠恐窮簷
艱難或至於顛連失所耳近者民力雖已稍紓然念分

年帶徵銀兩若不格外優免則小民一歲之所獲分納
二年之賦以其贏餘養贍室家斷難充足朕每念及此
軫惻良深宜更加殊恩通行豁免今將直隸安徽江蘇
浙江江西湖廣西安甘肅等八處帶徵地丁屯衛銀二
百三十九萬八千三百八十兩有奇槩免徵收其漕項
雖例不准免亦著破格施恩將安徽江蘇所屬帶徵漕
項銀四十九萬五千九百五十餘兩米麥豆一百十四
萬六千六百一十餘石內免徵各半爾部即行文該督

撫嚴飭所屬實心奉行徧行曉諭俾民間無徵催之累均沾實惠用稱朕撫恤羣黎至意

康熙五十七年戊戌閏八月戊辰

上諭戶部朕臨御五十七年凡師行轉餉及災祲偶見靡不厪懷憂切蠲免賑濟稠疊加恩蓋治安天下惟期民生得所而欲民生得所必以敷恩寬賦爲急也三年以來因策妄阿喇布坦狂逞跳梁遣發大兵屯駐西邊一切軍興征繕雖動支正供錢糧不使累及閭閻而轉輸

輓運陝西百姓勞苦急公實堪憫恤又莊浪等處地震
隨經特遣部院堂官馳往察賑而用兵之後尤宜格外
施仁撫綏黎庶應將陝西巡撫甘肅巡撫所屬通省各
府州縣衛所錢糧米豆草束悉予蠲免目今係有軍務
之時除米豆草束外其康熙五十八年應徵地丁銀一
百八十八萬三千五百三十六兩有奇并歷年積欠銀
四萬七百五十七兩有奇著一槩蠲免爾部速行文該
督撫通行曉諭實心奉行務俾均沾德意以副朕篤念

民勞拯恤災傷至意

康熙五十八年己亥十二月辛酉

上諭戶部朕惟治天下之要務首以乂安民生爲先故自御極以來於閭閻疾苦無不博諮廣詢渙敷庥澤其有動用民力之處尤惻然軫念刻不能忘蓋六十年如一日也比年因策妄阿喇布坦狂逞跳梁興兵征勦遠歷邊陲其沿邊數處師旅屯駐一切雖皆支用正項錢糧而協辦轉輸行齎運送之事民力勞瘁朕心時切憫念

曾將陝西甘肅所屬康熙五十八年額徵地丁銀一百八十八萬兩零歷年舊欠銀四萬兩零特沛恩綸悉行蠲免而沿邊各州縣衛所軍行既多飛輓之勞辦賦復滋催科之擾若非格外加恩小民恐致失業所有沿邊一帶陝西所屬府谷神木安塞綏德米脂安定吳堡保安榆林保寧常樂雙山魚河歸德嚮水波羅懷遠威武清平葭州龍川鎮靖鎮羅寧塞靖邊柳樹澗安邊磚井定邊饒陽水堡高家堡甘肅所屬山丹高臺古浪莊浪

西寧肅鎮寧夏左屯中屯平羅中衛靈州寧州平涼衛
固原鎮戎西安阜城甜水河州蘭州洮州寧夏前衛平
涼縣固原衛河州衛蘭州衛慶陽涼州衛永昌衛鎮番
衛甘州左衛右衛肅州衛鎮彝所等六十六州縣衛所
堡康熙五十九年錢糧米豆草束俱宜蠲免但目今係
有軍務之時除米豆草束外將康熙五十九年額徵銀
九萬八千一百兩零盡行蠲免爾部行文該督撫通行
曉諭實心奉行務俾均沾德惠以副朕曲軫邊民至意

康熙五十九年庚子六月丙辰

上諭大學士等曰朕聞保安懷來等處地震宜速遣大臣
前往賑濟若俟部中啟奏恐致遲延著副都御史楊柱
屠沂速自京城出居庸關前往延慶保安懷來沙城等
處查閱一面奏聞加恩并查驗蔚州廣昌渾源等處如
果被災著一并加恩直隸守道李維鈞亦著量帶地方
官數員前往賑濟

七月丁卯

上諭副都御史楊柱等曰保安等處地震爾等前往散賑
毋得愛惜銀兩有不足用即以奏聞務使百姓均沾實
惠不可速回俟民情安定再行回奏其保安等處本年
錢糧及次年錢糧俱著蠲免

十月戊申

上諭大學士等曰朕臨御以來凡事惟以實心行實政務
俾羣黎均沾實惠從未諱言災傷崇尚虛文今歲江南
浙江湖廣等省大稔豫省微覺歉收朕已頒諭旨將漕

糧停止起運令於彼處收貯但陝西地方見有軍務又
年歲歉收故朕預頒諭旨著總漕施世綸協同總督鄂
海辦事除陝西歷年錢糧屢經蠲免并明歲錢糧另頒
諭旨蠲免外見令動支倉穀散賑而地方官員大半悉
在軍前辦事之人殊少應照從前賑濟山東百姓之例
差官往賑著九卿詹事科道會議具奏

庚戌

上諭戶部朕自御極以來無日不以民生爲念凡閭閻疾

苦必詳加諮訪至於地方偶遇災傷一有所聞即行蠲賑撫恤備至務期黎庶遂生樂業優游化日六十年來夙夜孜孜未嘗稍釋也邇年因西陲用兵師行糧從雖芻粟悉支正供絲毫無擾民間然轉輸必需民力勞苦宜恤曾將康熙五十八年陝西甘肅所屬額徵地丁銀一百八十八萬兩零歷年舊欠銀四萬兩零康熙五十九年沿邊各州縣衛所額徵銀九萬八千一百兩零屢沛恩綸盡行蠲免近聞二年歉收民有艱於粒食辦賦

急公力何能支若非渙敷德澤無以培養窮民是宜特
頒浩蕩之恩用申勤求民瘼之念著將陝西甘肅所屬
各州縣衛所除應徵米豆草束外康熙六十年應徵地
丁銀一百八十八萬三千七百四十兩零通行蠲免爾
部速行文該督撫徧行曉諭實心奉行務俾均沾實惠
如有不肖官吏陽奉陰違澤不下究該督撫嚴察題叅
從重治罪又署撫花善奏稱甘肅地方數年歉收糧草
價值騰貴兵丁採買維艱朕念兵丁効力行聞勞瘁堪

憫准預給半年兵餉著即行文附近省分撥銀三十萬兩速解甘撫頒發以副朕篤念民勞優恤軍士至意

康熙六十年辛丑四月丙辰

上諭戶部朕覽京畿所報米價甚貴著將京通倉米石交與侍郎張伯行此時價酌減糶賣內務府莊頭所交穀石見在州縣收貯亦著派滿漢賢能司官照此糶賣正值穀價騰貴之時恐有偷盜倉內米石者著提督不時緝拏

五月乙酉

上諭大學士等曰朕因陝西歉收雖將錢糧蠲免動給倉糧又發庫帑特差官員散賑百姓尚未安堵今施世綸亦束手無策此皆係地方官員不切實留心爲民設法綏理以至百姓流離聞得山西陝西富戶積藏米石甚多若有賢能官員勸諭糶賣可以多得著將內庫銀發五十萬兩令左都御史朱軾往山西光祿寺卿盧詢往陝西再派部院賢能官員隨往每處銀二十五萬兩勸

諭富戶照時價糶賣米石庶乎易得將此旨傳示九卿

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四十一

欽定四庫全書薈要卷七千八百十二

史部

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四十二

積貯

康熙十七年戊午二月庚戌

上諭戶部積貯係國家大計年來各路兵馬需用糧餉浩
繁在外總督巡撫及經管錢糧各官俱宜潔已奉公殫
心稽察一應支放開銷務嚴加覈實節省方於軍國有

裨近見各路奏銷或制備物料並不先行題明藉口軍機緊急濫請銷算或不行察核重複支給又不為扣抵或朦混重領希圖利己致滋糜費以及侵欺浮冒種種弊端難以枚舉以後應作何禁飭爾部會同兵部工部詳議具奏

康熙十八年己未六月辛未

上諭戶部民生以食為天必蓋藏素裕而後水旱無虞自古耕九餘三藏富於民經久不匱洵國家之要務也比

以連年豐稔粒米充盈小民不知儲積恣其狼戾故去年山東河南一逢歲歉即以饑饉流移見告雖議蠲議賑加意撫綏而被災之民生計難遂良由地方有司各官平日不以民食為重未行申明勸諭故也近據四方奏報雨澤霑足可望有年恐豐熟之後百姓仍前不加撙節妄行耗費著各該地方大吏督率有司曉諭小民務令力田節用多積米粟俾俯仰有資凶荒可備以副朕愛養斯民至意

康熙二十年辛酉三月庚午

上諭戶部倉場侍郎等曰近聞各倉發米多雜土塵有賄者給好米經營之人種種作弊上下串通侵欺盜取者甚多此米係人生命朕一經體察務將始末澄清爾等應知此等情弊若不加嚴察永行杜絕是知而自取罪戾矣

康熙二十一年壬戌七月甲寅

上諭戶部各省常平等倉積貯米穀甚屬要務有此積貯

偶遇年穀不豐彼地人民即大有裨益雖先經奉旨通行恐有名鮮實一遇水旱議賑之時未能接濟致民生艱困今將某省實心奉行某省奉行不力其逐一詳察以聞

康熙二十五年丙寅六月丙辰

上諭大學士等曰朕自即位以來二十餘年凡民間之事留心體訪深知情狀古人不言救荒而言備荒故三年有一年之積九年有三年之積雖間值水旱小民不致

失所去歲可謂豐年設今歲不登即致饑饉總由素無積貯耳即常平一倉積米太多亦易朽爛若臨時令有司捐貸則又不可縱有良法奉行不得其人終屬無益苟得良有司視民如一家休戚相關始克有濟耳

十二月丙辰

上諭大學士等曰聞有運盛京糧米於山海關內者又有泛海販糶於山東者糧米所繫最為緊要況今議遣防戍官軍人口衆多糧糈未必足用宜下所司密咨移盛

京將軍副都統戶部侍郎令以已意禁止之

康熙二十八年己巳十月辛卯

上諭戶部倉廩積貯專備本地災歉若因應賑州縣無糧以他處倉米易銀移賑則有糧州縣反無備災之糧倘遇凶荒其何以應且一時出糴其價必賤於賑濟亦無大益其積貯不足之所可動支正供錢糧速行賑濟

康熙二十九年庚午正月癸卯

上諭戶部朕撫御區宇夙夜孜孜惟期厚民之生使漸登

殷阜重念食以養民必蓋藏素裕而後水旱無虞曾經
特頒諭旨著各地方大吏督率有司曉諭小民務令多
積米糧俾俯仰有資凶荒可備已經通行其各省徧設
常平及義倉社倉勸諭捐輸米穀亦有旨允行後復有
旨常平等倉積穀關係最為要緊見今某省實心奉行
某省奉行不力著再行各該督撫確察具奏朕於積貯
一事申飭不啻再三藉令所在官司能俱體朕心實有
貯積何至如直隸地方偶罹旱災輒為補苴之術嗣後

直隸各省總督巡撫及司道府州縣官員務宜各遵屢
次諭旨切實舉行俾家有餘糧倉庾充牣以副朕愛養
生民至意如有仍前玩愒苟圖塞責漫無積貯者將該
管官員及總督巡撫一并從重治罪爾部即遵諭通行

七月癸巳

上諭戶部朕撫育黎元勤思治理足民之道宜裕蓋藏從
來水旱靡常必豐年恒有積貯庶歉歲不憂饑饉如康
熙二十七年頗稱歲稔誠使民間經營撙節早為儲侍

何至康熙二十八年偶遇旱災室皆縣罄總因先時無
備遂至餬口維艱比蠲除正賦特發帑金分行賑濟所
在官司悉仰體朕懷竭力從事被災之衆始獲安全倘
非拯救多方則窮黎必流移失所今霖雨時降黍苗被
野刈穫在即可望有秋惟恐愚民不知愛惜物力狼籍
耗費祇為目前之計罔圖來歲之需縱今年獲屢豐亦
難漸臻殷阜應行直隸各省督撫嚴飭地方官吏家諭
戶曉務俾及時積貯庶終歲所食常有餘儲用副朕軫

念民依綢繆區畫至意爾部即遵諭行

康熙三十一年壬申正月壬子

上諭大學士等曰去歲陝西西安等處年穀不收罔有積貯以致閭閻困苦已遣使賑濟之矣今年豐歉尚未可知陝西省府州縣見存米穀之數應行察明先時豫備至各省府州縣皆令積貯米穀數千石則裨益黎庶者大矣可下各該督撫等令各府州縣積貯米穀其所積穀數逐一繕冊報部

五月辛亥

上諭大學士等曰朕思積貯米穀最為要務倘能實有蓋藏則雖遇荒歉必不至於饑餒但小民不知儲備每遇豐稔之年恣意糜費一遇歉歲即坐困不支今值麥田收穫之時應行各該地方官勸諭百姓令各戶量力捐輸積貯該州縣官以輸納之人姓名數目詳記冊籍當秋禾收穫以後亦依此例舉行至春月轉貸於匱乏之民俟秋月即照此數償還備用每歲如此遵行不數年

間米穀充裕縱使歲遇不登何至閭閻艱於粒食乎

康熙三十三年甲戌七月辛卯

上諭大學士等曰密雲縣田禾失收今年雨水甚大著速行文倉場侍郎將通州倉所貯粟米以一萬石運至密雲縣五千石運至順義縣乘水方盛速行運到令其收貯

康熙三十四年乙亥八月癸巳

上駐蹕密雲縣

諭大學士等曰去歲朕見此處高粱結實者少秕者多米價騰貴高粱一斗幾三百錢故將通倉米令運一萬石至此處五千石至順義縣減時價發糶米價稍平一斗百錢民以不困北地寒冷米穀多至失收今河水方盛著將通倉米運至密雲順義各一萬石令貯倉備用

康熙三十五年丙子十二月辛亥

上諭大學士等曰黑龍江吉林烏喇地方頻歲不登可移文盛京將軍令整繕船隻將盛京倉儲米穀以彼地人

力運五千石至莫爾渾阿敦之地積貯之又

諭曰今歲自天津海運至盛京之米已給散科爾沁貧乏之衆來歲仍當自天津運米至盛京其轉運船隻不必用福建浙江二省船止用天津船輓輸一次可傳諭侍郎陶岱

康熙三十六年丁丑三月壬戌

上諭大學士伊桑阿曰州縣俱有積貯米穀兵丁所駐沿邊衛堡亦甚緊要其榆林等處衛堡俱照州縣積貯

之例將米穀積貯豫備著交該巡撫遵行

七月丙午戶部議覆陝西巡撫巴錫疏言各衛堡積貯米穀宜分撥沿邊各堡運貯應如所請

上曰此各衛堡米穀若責令承收官員自備轉運之費路遠而險勢必科派小民巡撫之奏戶部之議皆非也其俟秋成後令該撫酌支正供買米收貯

康熙三十七年戊寅二月庚午

上諭大學士等曰戶部將曾經保舉司官二員差徃被水

災沿河之保定霸州固安文安大城永清開州新安等
州縣截留山東河南漕糧每處運致一萬石以備積貯
俟米價騰貴時平價糴賣

康熙三十八年己卯十月癸酉

上諭大學士等曰黑龍江地方連歲歉收著將烏喇收貯
米糧運至默爾根齊齊哈兒地方豫備若彼處有引水
種田之處著能耕種之人前去教導交該部議行

康熙三十九年庚辰三月乙未

上諭戶部淮揚等處百姓罹於水災未寧幹止朕心時切軫念比歲以來多方憂恤蠲免賑給靡不舉行去年春朕親履河工目擊小民田廬皆被淹沒災黎艱於粒食益惻憫於懷爰命地方按戶賑濟又將截留漕糧發賑平糶俾得贍養上下兩河堤岸前屢發帑金修築去年二月面諭河工諸臣速行修治至今尚無成效復遴選廷臣同往經理無非軫念民瘼欲令黃運兩河堤岸速成斯民早安生業耳念水患一日不除則百姓一日不

得耕種因是深以為慮著將今年漕糧截留二十萬石
存貯淮揚地方備用爾部即遵諭行

七月丙辰

上諭戶部國家要務莫如貴粟重農朕宵旰圖治念切民
生惟期年穀順成積貯饒裕於以休養黎元咸登樂利
今聞直隸各省雨澤以時秋成大熟當此豐收之時正
宜以饑饉為念誠恐歲稔穀賤小民罔知愛惜粒米狼
戾以致家無儲積一遇歲歉遂致仳離著該督撫嚴飭

地方有司勸諭民間撙節煩費加意積貯務使蓋藏有餘閭閻充裕以副朕重農敦本愛養元元至意

康熙四十一年壬午三月辛卯

上諭戶部朕躬理幾務年久深知稼穡之事念阜民之道期於有備去冬北地少雪今春雨澤微降尚未霑足誠恐蝗蝻易生有傷農事所在官吏亟宜先時豫防直隸山東山西河南陝西江北地方歷年積貯倉糧果否足額該督撫宜確加稽核務使廩有餘儲不致匱乏其一

切豫備事宜須悉心講求料理縱年歲不甚豐稔亦可
賑濟無虞至直隸各省見今雨澤有無多寡著該督撫
即行具摺奏聞以紓朕宵旰勤民之意

康熙四十二年癸未十二月辛卯

上諭大學士等曰朕頃巡幸陝西閱視汾渭俱屬大河直
與黃河相通河南等處米穀似可由黃河轉運但聞三
門砥柱水勢極溜船不能上朕欲親往閱視因陝州知
州奏無路徑斷難行走遂未果行特命三貝勒允祉同

近御侍衛徃視據回奏言伊等遣人乘騎涉河一道閱
有神人鬼三門俱係鑿石開通水從三門流出其勢甚
寬其流甚急古人於山上鑿有曳船眼孔但未經以船
試驗不知可否行走前總河靳輔亦曾奏黃河通於汴
河但淤墊年久若行疏導即可運糧朕至河南閱河南
府居各省之中水路四達最為緊要之地應於此處儲
積米穀每年田畝豈能必皆豐收倘山陝等省間或收
成歉薄即可將此積貯米穀修造船隻由黃河挽運若

到三門砥柱船不能上亦可於三門砥柱造船剥運以至山陝誠使河路疏通則商賈人民大有裨益所宜於無事之時豫為籌畫者也豫省每年解京漕糧二十萬石有奇若將豫省三年漕糧截留備用則陝西等省雖值歉收之年將此米穀運至彼處賑濟殊屬有益俟明歲遣大臣往視

康熙五十二年癸巳五月辛巳

上諭大學士等曰今年八九月內應撥江南省積貯倉米

十萬石用京口將軍標下戰船及松江提標戰船狼山鎮標戰船裝載著總兵官穆廷桂總管船隻浙江省積貯倉米內亦撥十萬石用浙江提標戰船及定海鎮標戰船裝載著總兵官吳陞總管船隻俱運至廣東此運米兵丁往返時或遇風勢不順行船有阻亦未可定所需口糧皆宜豫備但不得動用賑濟額米江南織造署內朕曾令貯米一萬石如八九月間江南無動用此項米石之處即將此米石亦令一并運去著行文該督撫

知之

康熙五十三年甲午七月辛亥

上諭大學士九卿等曰朕聽政年久深悉民生利弊凡國家要務無時不豫為籌畫有奏摺人來朕皆細問咸稱江南天旱江浙米價亦不甚賤今春山東河南田麥歉收交冬米必騰貴若待彼時方為料理恐不能及朕詳悉思維將漕糧撥三十萬石江寧府十萬石蘇州府八萬石淮安府揚州府共五萬石杭州府五萬石開封府

二萬石著漕運總督親身閱兌速行運至今其加謹照數收貯有此米石軍民心安而米價自不驟貴至豫省漕糧該部亦應豫行詳議今若雨澤及時田禾豐收則此項米石由水路撥給他處亦可著議奏

十一月乙卯

上諭戶部朕臨御多年無時不軫念民瘼每歲於直隸各省凡雨暘期候豐歉情形莫不留心訪察雖在僻遠必務周知偶值一二處災傷蠲免賑救不惜重費倉帑以

蘇我民困也朕思賑濟災歉以速為貴必待督撫奏報
往返候命使小民嗷嗷待哺何如豫備積貯於平時則
所在有可恃之資而臨事免轉移之勞今漕輓通行倉
庾充裕江浙地方年來頗有歉收州縣應酌量截留漕
米分貯各處江寧原留五萬石今再截留十萬石蘇州
原留八萬石今再截留二萬石安慶截留十萬石杭州
原留十萬石今再截留十萬石皆於本年起兌內就近
截留令地方官加謹收貯至應動用之時著該督撫題

請爾部即遵諭行

康熙五十五年丙申五月壬申

上諭大學士等曰閱今歲督撫等奏摺陝西山西河南山東等省二麥豐收乃京師麥價未見甚減京師所賴者山東河南之麥此兩處俱通水路不知一年販來幾何或沿途富商大賈豫行收買以致京師麥價不減亦未可定從前江南浙江所買湖廣江西米數及湖廣江西賣去米數該督撫俱具摺奏聞大有裨益今山東河南

除陸路販賣者無庸稽察外自水路買來麥穀數目可
否照湖廣江西督撫具摺奏聞之處爾等會同九卿確
議具奏

十月丁亥朔

上諭大學士等曰張伯行條奏宜立社倉前李光地為直
隸巡撫時亦曾請立社倉朕諭此事言之甚易行之甚
難爾姑試行後試行之果無成效倉糧庫帑設官專理
尚且虧空社倉所收穀石交百姓收貯寺廟虧空又何

待言耶其果否可行之處爾等會同九卿詳議具奏

康熙五十六年丁酉四月乙未

上諭大學士九卿倉場侍郎等曰邇年以來通倉積米甚多著分運直隸各府州縣存貯豫備於民甚有裨益每府或貯萬石每州縣或貯數千石附近通州河道者交與倉場總督等運送其餘府州縣所運米石速行文直隸總督派地方官乘未雨之先輓運值此青黃不接之時於各府州縣平糶亦大有益於百姓其江南浙江如

有應行截留漕糧若干之處爾等一并速議具奏

丁酉

上諭大學士九卿等曰近來米價必不能如往年之賤昔大學士張英曾奏桐城縣米價銀一兩可得三石見今四川米價亦復如此雲南廣西貴州米價亦不甚貴大抵戶口稀少則米價自賤今太平日久生齒蕃息安能比數年前之米價乎戶口殷繁固是美事然當豫籌安養之策今將米石運送各處或平糴或賑濟不過僅可

餉口未必即能充裕張伯行曾奏於永平府設立社倉
永平知府近日行之甚苦社倉之法既屬難行通倉米
石有餘不如運送各州縣為便又

諭曰見今通倉米石甚多應運送之州縣即當運送去年
皇莊米石俱交州縣積貯但倉中未必實有其數畿南
廣平大名等府有水路可通應交直隸總督作何運送
至密雲古北口去年曾運通倉米每處各一萬石亦甚
易或仍交倉場總督運送爾等速議具奏

康熙五十八年己亥正月壬寅

上諭大學士九卿等曰京城通州倉內貯米甚多各省運至漕糧亦無虧欠在倉堆積恐致紅朽杭州蘇州鎮江江寧淮安安慶等處俱有倉廩與水路相近江南浙江漕船想此時已過淮朕意欲將湖廣江西等未過淮漕糧截留存貯此等地方倉內遇米價騰貴之年將此存貯米石或減價糶賣或行散賑則民人得沾實惠大有裨益如蠲免地丁錢糧不過於田多富戶有益其無地

窮民未必均沾實惠米穀甚屬緊要不可不豫為備也
年來豐收米價雖賤但歲歲大有豈能期必乎應將久
遠裨益之處豫行籌畫爾等將漕糧作何截留之處會
同議奏

康熙六十一年壬寅四月戊午

上諭戶部趙宏燮奏將收貯真定順德各州縣四萬石米
平糴其餘各州縣有未貴之處亦將倉米平糴十分之
三俱俟秋收後買補還項等語去年各州縣收貯莊頭

等所交米石部內曾遣司官會同地方官糶賣其糶米銀兩至今尚未完繳據此各州縣收貯倉米俱無實際平日積貯原為備荒而設今值青黃不接之時固應平糶但地方官虧空倉米不過糶賣數石即借此掩飾虧空究竟倉米既虧百姓何從糶買於民生並無裨益也見在存倉米穀如果足數即照該督所請糶賣倘朕遣大臣查看時州縣並無米穀黎庶不得糶買將州縣官即行正法該管上司從重治罪

六月壬戌

上諭大學士等曰暹羅國人言其地米甚饒裕價值亦賤
二三錢銀即可買稻米一石朕諭以爾等米既甚多可
將米三十萬石分運至福建廣東寧波等處販賣彼若
果能運至於地方甚有裨益此三十萬石係官運不必
收稅

十月辛酉


上諭議政大臣等曰倉糧關係甚要支放米時理應一嚴

放畢再放一廩今聞此廩米石支領方半又向別廩支領所剩米少而所占之廩甚多又支領白米時諸王公主等屬下之人不按應放之廩領米而揀廩霸占支領者有之此等斷然不可理應按廩支領如廩內餘米一半者即是弊端應將此徹底清查若遣他人亦未能辦著和碩雍親王帶領弘昇延信孫渣齊隆科多查弼納吳爾泰前往會同張大有查勘再從前倉內每日進廩之米止四五千石自簡任富寧安以來每日進廩之米

至四萬石進米多則於回空糧船有益至於米色之變俱在收貯之善與否即如昭五達地方所貯米石歷四十年米色照常並未霉爛今厥座有損漏者著即修理如不敷用著即添造



大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四十二



總校官庶吉士臣張能照

校對官檢討臣李學錦

校對官庶吉士臣章宗瀛

謄錄監生臣王詢

謄錄監生臣張廼理